

天一閣集

天一閣集卷之八

四明范欽安卿 著

元夕東沙宅觀燈二首

良夜當三五來過仲蔚家繞庭攢火樹近市接烟花
影散金波月光含玉甕霞清歌揮不斷門外七香車
佳燕乘春集華燈入夜開宮疑天上出人自月中來
變幻魚龍戲參差星斗迴調高驚寡和不減郢人才

正月十三夜集竹墟宅

張燈當此夕結束在高林月白迷城騎風暄散渚禽
芳春遊子興長夜故人心見說香山會流風直至今

十七夜集

高城燈尚開華月復東來欲盡今宵興須留上客杯
鰲山懸斗極蜃氣結樓臺試問行遊者金鈿拾幾枚
千秋節

蒼籙千齡啓瑤圖十葉新桂宮移法駕蘭殿集冠紳
座迥星辰隔心馳江海均溫文知有頌長此奉昌辰
春日感述

詔下中朝日誣分南國年臣心元似水

帝德自同天卧覺滄洲穩名看白首全春風殊有意
頻見好音傳

過碧沁

草閣懸湖上春來一漫遊
露華浮小徑蘭氣襲芳洲
笑我便魚鳥從人呼馬牛
漁郎亦何意歟乃下中流

送中甫遊燕

風流屬呂虔對酒且留連
客路空江杳離心落日懸
雲龍瞻上國花柳入新年
欲問金臺處誰應駿骨憐

春郊遊望

花日散輕陰郊行春未深
蒼山遙在眼流水獨知心
帆出江中樹風喧谷口禽
貪懽不覺暮纖月暎疎林

贈顧司理

握手即言別，悵然臨路岐。
游雲暮不止，孤鳥聲何悲。
漫惜一尊醉，還當隔歲期。
南來有回鴈，爲我寄相思。

贈王紹祖

相見苦不數，飛旌遽報還。
客心懸茂苑，別路泝江關。
霏雪千峯暮，空林盡日閒。
獨餘招隱意，叢桂可重攀。

送王應二子訪虔州方丞因簡二首

立馬催晨發，翩翩何所之。
獨憐彈鋏意，兼值閉關時。
雪壓番湖道，風流楚客詞。
嶺梅千樹發，寄取向南枝。
送君不得遠，徒倚令心傷。
落日雲千障，西風鴈幾行。
故人餘意氣，此道有輝光。
莫問章門水，年來思緬茫。

王鵬江携諸君重過纓泉宅賞菊四首

山第臨湖起沙暄菊正開賞心曾不極載酒此重來
影掣湘娥珮魂披神女臺不須防夜禁五馬足徘徊
藝菊紆三徑流觴集衆賢風流今不減勝事古猶傳
雨過神初醒燈來色更妍憑君借光寵留待艷陽天
芳園誇獨勝高會不辭多徑僻烟霜淨堂開綺繡羅
停杯矜楚醴徵調入吳歌聞道群黎樂年今大有禾
林居捐物累常憶賞花辰乘興逢賢主開懷盡友人
浮沉千古跡聚散百年身莫笑陶彭澤籬邊漉酒巾

貽程應魁茂才

籍甚西江彥來過滄海濱法書王逸少高詠沈休文
怒鼓圖南翼才空冀北群祇應倚脩竹長日對溪雲
送人遊淮南

早歲嗜奇遊才情司馬流西陵初問渡北固幾登樓
山勢來天目江潮過石頭欲知淮泗地王氣至今留
朱總戎宅菊二本五月盛開

本是陶家物元戎宅裏栽欲彰清世瑞故傍艷陽開
帝女欣相倚天孫巧自裁明年應許我取醉看花來
柬李賓甫

聞有餐霞興逍遙江上村水雲流几席蘿月靜

門

談劇時揮麈吟成或舉尊不知市隱者幽緒可誰論

贈屠田叔

裘馬競連翩如君思獨玄耽書忘歲月染翰落雲烟
世業常賢後詩名廬照前古來英達士努力自芳年

柬張平叔

平子稱英物秋來病若何涼風臥林簾清思滿烟蘿
漫說屠龍技深憐衰鳳歌白雲如有意來往只庭柯

酬陳梅山副憲

長安十載別此地偶經過顧我沉冥甚當君感慨多
人生豈金石世道自江河棄置弗復論風前一嘯歌

潘翁

潘翁今百歲風骨尚精英四海推前輩五朝逢太平
市居常避俗樗散不求名世上悠悠者金丹何日成

湖上

月湖風物好稍得暢心顏鳴鳥時高下游雲自往還
開軒當曲渚岸幘見南山不待尋源去依稀濠濮間

貽柴季通

柴生跼跬士少日更迂踈希世無長策還家只舊廬
詩沿近代體篆結古人書知有蘇卿舌何妨駟馬車

忌日

寂寞吾親忌音容想盡圖流光仍塞鴈返哺自林鳥
落日川原迫清秋涕淚孤有懷何以報天地此生俱
包舉之赴南京兆

京兆之官日留都佐政辰雲霄千里道簿領十年人
帆落江城暮花迎漢時春朋遊多俊達詞賦日相親
寄樂惠州吾江

三巴初出守五嶺復移官名世珪璋重炎風道路難
猿聲寧下淚荔子欲舒丹不盡交親意臨江一采蘭
寄沈中夫侍御

南國沈休文風裁到處聞清時拋漢綬白日卧江雲

天曠龍蛇野心憐鴛鴦群山公曾有啓虛薄愧殊勲

九日邵西谷余鶴山施南渚陸十洲王安菴集

夙有登高興攀携過草堂名流推五老佳節是重陽
黃菊開猶未清尊醉不妨小山聊一上叢桂意難忘

冥寂

冥寂存吾道城隅雲木幽何來清晝夢仍作玉京遊
曆數歸今主河山領上游匡扶仗諸老早慰杞人
憂

登長安城樓

雲閣縱秋攀三秦指顧間河流銀是派古玉爲關

南下鴈初急西征人未還
謫宦憑上策不戰定夫
春日志感

繩檢稍知循何緣欲侮人世途滄海變交態白頭新
積羽真摧軸千金空買隣當知昔人意讓畔未爲貧
題楊義問園廬

高人期避俗結宇傍城陰鳴鳥四時變閒雲一徑深
晝來常隱几花發但橫琴奇字還堪問能容載酒尋
李賓甫楊義問見過即別

水閣倚雲根終朝祇閉門不因迂妙躅那得領微言
野鳥初分席山花待舉尊胡然揮手去空復睨乾坤

夏日集東沙

却暑當湖閣相將愜故群
解衣園菜竹移席就南薰
白戰催行酒清言罷論文
興高猶未已秉燭坐宵分

山行

山霽沂氤氲源深路不分
花林過白鹿麥隴散黃雲
野老巾車共僊家鷄犬聞
到門流素月深坐對爐薰
分題候瀟山贈王鵬江太守二首

勝地接蓬萊登攀醉眼開
烟中孤島出鳥外亂帆迴
濤迴天浮寺山空月滿臺
金聲元有賦知是大夫才
五馬經過地山靈亦徘徊
峯危先見日松老不知年

倦侶過相訪，禪床借獨眠。方舟吾欲駕，乘月下蛟川。

夏日李孝甫見訪

懸湖開小築，雨罷屬君過。涼思披梧竹，幽香入芰荷。
山吟逋客賦，渡引女郎歌。河朔稱高會，風流未足多。

贈周隱君

剡上饒名隱，如君古道存。開襟携白社，玩世客王門。
見月頻移舫，逢花對舉尊。延陵聞有訣，無地接高論。

題東沙小瀛洲二首

高人不偶俗，適意在林間。藝圃栽流水，開軒面好山。
去來幽鳥得，舒卷白雲閒。已釋形骸累，無勞更閉關。

自解尚書綬時聞營草堂橐金 明主賜家釀故人
嘗花月臨關靜松風捲幔涼誰當陪妙躅吟嘯海天
長

林居

經旬不出戶漸覺世情疎散帙風生榻狂吟月滿除
地疑中散舊人是上皇餘狗監何須問無心賦子虛
立秋日過賓甫讀騷軒

病久懷思劇寧辭觸熱行入門徵喜色下榻見交情
服食空嵇叔騷歌自屈平忽驚時序改梧竹已秋聲
中元日宴東沙山亭

留歡不覺暮改席就山泉况以清秋候兼之滿月天
蘭芳堪紉珮菊酒詎論錢宴罷出門去湖歌清采蓮

賦得薛樓贈袁別駕之南昌

傑構倚穹蒼居然是豫章廬峰拔地出江水接天長
世父龍蛇寂春回草樹香政成聊一上端不媿王祥
送虎丘日如上人還山

物外結清遊翛然返故丘祕乘馱白馬爽氣失青牛
地迥雲連海天空月滿樓妙悟從今得還應石點頭
李孝甫看雲池二首

憐君懷二弟祇學少陵眠積水連天淨閒雲倚日偏

心飛虛閣外目斷晚風前試問池邊草春還夢惠連
荆樹回新好棠華繫遠思何如臨水上常作看雲期
歲月長衾在心情短髮知赤霄行得路莫訝鴈行遲

送孝甫

伐鼓曳江津心旌向紫宸漏催雙闕曙花發萬年
春狗監知名姓龍門異等倫程庸端計日駉牝是何
人

姪澈使滇南四首

鳳曆千齡啓龍函六詔傳雲開星使路地盡夜郎天
頒瑞符虞典祈靈異漢年可令籌國計人復數張騫

望望日南域
綠遍湘江草
紅深羅甸花
猿聲當暮急
不必苦思家
憶忝分方地
今當覽勝時
蒼山懸蜀道
紺宇匝滇池
却瘴頻呼酒
觀風一采詩
武侯聲績滿
千古使人思
念爾阿咸行
懸弧志莫忘
清朝初奉使
華省復爲郎
九折輕王坂
千金謝陸裝
歸來報成事
天子正垂裳

會曾侍御高唐

候館雪連天
相逢驂馬前
論心忘永夜
憶別數流年
兵甲西隣楚
關山北接燕
明朝又分手
悵望各風烟

送楊博士棄官歸楚州

時論崇儒碩何緣遽拂衣
清淮千里道落日片帆歸
秋至秫田熟霜澄籬菊肥
高歌對尊酒陶令是邪非
一謝風塵累高居歲日長
獨携猿鶴侶重葺芰荷裳
白眼看人世幽心寄野航
小山有叢桂待爾恣徜徉

早春諸彥燕集得開字

年來常謝病春至一啣杯
庭草披襟得山雲捲幔開
風期千古並雪賦幾人裁
東下蓬玄近還期駕鶴來

春日湖上小集

方春無一事留客坐柴門
雪意催詩興波光蕩酒尊

清談忘爾汝白眼睨乾坤他日風花滿幽懷可重論
酬戴仲德用韻

芸閣倚城闌欣當把臂辰君稱能賦手吾亦放歌人
燈月千門曙笙歌九陌春攀留那可得歸去馬蹄新
春興

高居謝俗緣冉冉向春天白髮長吟裏青山倚杖邊
寒波深抱日細草澹生煙此意誰堪會方回不二禪
初夏理前約集沈嘉則余君房李賓甫沈箕仲
屠田仲戴仲德會豫章程孟孺亦至分得長字
山閣立蒼江追歡興未央花期臨首夏酒伴屬高陽

雨宿池波暝天圍海樹長誰能不待月歸路詠滄浪

和孟孺踈字

紫氣何來客通家文舉如聲華傾稷下詞賦擬黃初
竹戶含風爽花林過雨踈心期不易得莫遣綠尊虛
和嘉則遲字

白雨早來披波輕颺晚颺何當高枕候重與故人期
山暝歸雲盡天長去鳥遲接離吾已倒可似習家池
和君房深字

草閣暢幽襟飛觴共一臨罷官

明主惠綬轄故人心紫籜風中落蒼山雨後深輕鷗

來片片還傍釣磯灣

和賓甫寬字

長往山人事誰當意氣看忘年吾倒屣作賦爾登壇
雨閣城雲縠波涵海月寬不須論酩酊幽意在林巒
和箕仲微字

風流推小阮發興屬替扉信步隨芳草長吟駐落暉
溪聲和雨斷山翠落空微來歲看花地香塵正撲衣
和田仲空字

憐君方予告灝氣入冥濛藉以藤蘿月因之荷芰風
星輝緣坐發河影入杯空借問談天客何如碣石宮

和仲德多字

亦是賢公子相憐坐薜蘿地偏幽鳥得臺迺夕陽多
君已清狂劇吾如濁酒何百年渾一瞬心賞莫蹉跎

湖閣

陰陰堤畔柳宛宛水中鷗物色餘三月心期祇一丘
分林花勸酒隔嶼客呼舟入夜來漁唱猶堪作卧遊

訊賓甫

勝賞臨何地依微湖水頭天低平楚盡江濶片帆流
對月頻裁賦看雲獨上樓閉關應未得吾欲采芳遊
送嘉則遊吳

亦有丘中好能忘物外遊江空天欲墮沙白雨初收
買醉高陽侶尋僊何處樓林田行可熟翹首問歸舟
夏日同諸彥遊溪隱莊分得重字

蒼山開別業長日對從容門倚煙霄近城窺海霧重
鳴禽移獨樹涼月上高峯已自成招隱無勞訪赤松
和賓甫低字

本是武陵谿重來我亦迷花沿一徑杳天入萬峯低
接席爭裁賦穿林獨杖藜不妨幽絕甚爛醉已如泥
和孟孺懸字

霞佩共僊僊開襟坐晚天地偏群籟寂山迥一燈懸

日月銷沉裏乾坤莽蕩前誰當凌絕頂長嘯出蒼煙

和君房新字

僻地滿留春還逢載酒辰雲光連海白天影落杯新
栖鳥猶呼侶餘花欲趁人典衣亦細事來往可辭頻

和箕仲開字

飛閣入雲裁凱風應節來放懷千古盡倚目萬山開
君是藏真侶吾寧作賦才明朝出門去惆悵又塵埃

和田仲還字

風日敞空山何如消夏灣行隨蒼逕遠心與白雲閒
澗古幽花發林昏倦鳥還僊巖知不遠留興待躋攀

登夜移巖

惟石何年徙相傳自六丁中天憑日月空海縹緲瀛
血倚秦鞭天聲餘泗磬清欲知幻化術還我訪初平
期嘉則不至得選字

爾赴何方約令予逸思消江雲空漠漠崖日故蕭蕭
坐遣流華逝心隨去鳥遙山中有桂樹折盡不成招
懷屠張二司馬得分字

窈窕神僊窟飄飄猿鶴群高人不我至搔首坐宵分
梁落江城月門停洞壑雲不知招隱賦何似北山文
懷仲德

偶結雲遊去君栖獨故林迴看物華換予意一何深
月明疑雪夜溪宿即山陰西首應長睇冷然會此心
袁莊即事

迢遞空山裏松阡一徑迷古碑蒼蘚合暝樹子規啼
齋午分香飯亭偏榻舊題

上有張即之書棧雲二字

興闌騎馬去

斜日萬峯西

游資教寺

看山興不極東下得招提香閣初過處禪床獨坐時
空花隨意落幽鳥與人期不待尋真去冥心已自披
孟孺卧病寶雲寺走簡

山遊曾幾日歸卧狎金僊笑我猶餘興憐君正妙年
煙花空外象水月靜中緣好似維摩病清涼會入禪

懷汪長文時居城寺

久訂看雲約西來悵不逢溪猶通一水人似隔千峯
露浥中林草風飄遠寺鐘何因乘逸興從爾采芙蓉

懷吳汝震

嗟君擁高寢而我恣清遊門迥天連海山空風滿樓
興高惟作賦望遠欲移舟明月知人意來從滄海頭

送君房應詔公車

嚴城啓曙鴉浩思耿天涯日月低燕樹河山擁漢槎

冀群高伯樂劍氣識張華知有天人策無令異代誇

挽李太學尚甫二首

自結東陵隱常携方北海尊流光不相待幽緒與誰論
月慘歌聲香霜摧劍氣昏空然懷悵嘆何處可招魂
林丘坐岑寂念爾自堪憐白眼遭時輩青袍欲暮年
兩兒猶弱齒百事已黃泉却恠隣家笛淒涼入夜偏

貽李孝甫

京洛來歸客霜風鬢已絲何當謁

王日翻作哭親時望眼孤雲斷愁心寸草知從今門
下客還廢蓼莪詩

訊孟孺

蕭洒青雲侶，高懷近若何。
豈緣梅雨積，不見草堂過。
山杪懸湖海，時光入芰荷。
一尊堪却暑，何日對高歌。

懷寄張孺覺參軍

縹緲蒼龍闕，迢遙白玉京。
路疑天上出，人在鏡中行。
吏隱便方朔

君王慕長卿，如問上林樹。
早已候遷鶯

懷呂中甫上黨

長年依

帝子，何似漢枚乘。
結客惟三晉，遊人半五陵。
月中催

授簡雪裏罷呼鷹曾念林遊者風前思不勝

黃資禮卧病有懷四首

不見高人面憂心日以忡難將一尊酒仍與此時同
影靜梧桐月神搖菡萏風中宵還有夢隱約水雲東
端居寡隣並長日坐煙蘿世態風中柳年光川上波
有懷從叔度無計問華陀稍待新秋月開襟共嘯歌
病蘇猶却客偃息祇山堂海月臨窓近天風拂袂涼
無能同把劍空復想歌梁不分沙邊鳥追隨思獨長
聞有餐霞術何緣病見侵悠悠塵土夢落落歲時心
投老堪蓮社披襟且竹林無令山水調寂莫負知音

碧沚園屠張二司馬燕集用韻三首

結念在園居今當對酒初林光窺窳篠池影入空虚
已枉僊人駕寧同高士廬行厨不厭薄帶雨剪諸蔬
草閣湖中央依稀濠濮鄉千章夏木繞一鏡水雲長
人意生虛寂天光墮渺茫陶然忽已醉不復問滄桑
長日坐沉冥清時一草亭波流無兩白杯影接天青
吾自欣披霧人猶疑聚星欲知清暑渴懸綆汲中泠

過茅山晉安院四首

共道茅山勝從來靈秀鍾歲深丹竈得

山以茅君脩練得名

洞

杳白雲封有客披馴象

山形似象

從誰問駕龍行遊不覺

暮朗月滿諸峯

昔憐僊子宅今作梵王家一水涵空月諸天散雨花
浮雲倏以逝塵世渺難涯安得輕身術相將凌紫霞
偶發觀山興逍遙入化城峯雲凝遠黛江雨走寒聲
解帶松蘿合穿林竹逕清空王何必問今已得無生
淨鏡江山滿空堂歲日深行天餘白鶴布地盡黃金
超曠開迷眼清虛長道心一丘吾已得千載足幽尋

德孺見過

觸熱猶能過翛然對晚山涼雲方滿坐華月復臨關
世路冥心外交情把酒間夜來新雨足一與弄潺湲

留悟用韻答張東沙

吾豈是桐君時來逸思紛地偏湖上得種自嶧陽分
虛籟常令吹輕陰半濕雲徘徊不敢伐待爾鳳皇群
訪德孺不值

湖天澄夙暝祗苑薦新涼偶憶煙霞侶重披翰墨場
榻寧留孺子法自證空王徙倚思題鳳將無謂客狂
會戴文學即事 戴隨州人

相違四十稔來對泮池頭一語宦游事傷心骨肉傳
望窮神欲瞑氣結淚長流分手登車去炎風塞道周
送鮑叔夏

落魄鮑參軍才名衆所聞年來常作客此去復離群
帆出西陵樹天低南浦雲好憑三尺劍橫海樹高勲
伏日集孟孺田仲仲德得孤字

飛閣敞西湖炎天過酒徒蒼雲窺絕澗涼吹下高梧
興自清尊盡吟仍白雪孤誰言河朔後風韻至今無

挽程廣文暉

玉山人二首

廣文覺菴程君隆慶辛丑夏辭官自樂清過我草
堂訂藝論心迨兩月去乃循會稽歷武林吳門迤
邐至淮上名山奧區窮日搜攬采風吊古神力並
臻蓋充然得也久之迈玉山而息駕焉川陸采阻

曠不聞問會嗣子德孺稱捐賓客久矣悵嵇駕之
莫即儼墨淚之橫陳望風寄臆聊抒茲篇

念爾談經客時名迥不羣甌東初解綬地下忽脩文
摧栢孤兒淚生芻過客聞祗今王山上靈爽颯如雲
江門一爲別消息杳難傳悵我停雲日當君識鵬年
詩壇餘舊草墟冢落荒煙山水非無調思來欲絕絃
席上別德孺

歸思入鵷偏凌晨欲放舡開樽還此地爲別易經年
楚甸流雲滿江門落日懸文通曾有賦惆悵使人憐
夏日湖上十首

一入澄湖裏何當暑氣消臺依雲壑靜峯落海天遙
古樹行相傍幽禽坐可招不須涼吹發吾思已飄蕭
頗憐虛閣好爽氣結中洲芳樹隨年長清波盡日流
簷端落鳥毳霧裏隱龍湫何事淮南客徒因桂樹留
邇來思避暑選勝得林塘霧氣遙連郭槐陰正壓牀
何心結巢許有夢上羲皇俗駕還能避無須襍穢防
僻地煩囂隔高居雲物清蒼山當戶出白苧挾風輕
就蔭頻移席臨流一濯纓心期自有適不是愛逃名
散髮時忘櫛狂歌更倚欄遙空雲不斷深澗晝生寒
世已玄風邈人從白眼看夜歸猶有興飛夢落風湍

老去一潛夫披襟思不孤風前鳴萬籟樹裏耿重湖
獨往惟鷗渚相逢或釣徒由來莊惠意此際未能無
湖水含清泚天風送小舠一丘元自愜四海定誰豪
坐許清桐並詩希白雪高川雲如有意來往不辭勞
天空湖是月閣迥樹爲雲靈鳥乘時下清歌滿地聞
未須尋物外已覺遠人群漁父何無賴猶思釣席分
暝色紆三徑晴光敞十洲庭猶餘錦樹名洲人却擬丹
丘高枕松風落長吟海月浮秣綠酬嬾慢詎敢傲王
侯

大隱何城市幽心只草堂撫絃山水得捲幔海雲涼

虹影驅殘雨，蟬聲帶夕陽。
芰荷隨處滿，留待結爲裳。

送張孺愿赴試

楚楚青雲彥，才華少日成。
披香當月殿，鼓枻指江城。
龍虎三瓿榜，鯢鵬萬里程。
韋家舊業在，行見策高名。

天一閣集卷之九

四明范欽安卿 著

初秋湖上十首

續

小閣枕危磯迎飈敞四扉清暉當坐落紫鴈入空微
蛩響疑催織波光欲上衣即看持釣罷鱸膾異常肥
林居絕四隣長日可陶真一夕涼雲動彌天爽氣新
逍遙青雀舫傲岸白綸巾爲報澄湖道于今得主人
金飈初應律玉宇倍生涼況此亭臺迥無之雲水長
天流巖桂影露引渚蘋香何處菱歌起還應是女郎
浮槎停水國孤榻寄煙霞日暮鳴蟬急天空流火斜

呼童烹石髓留客飯胡麻漸覺中元近飛觴攬月華
此地何爲地今風異昨風清浮滄海氣寒擁白龍宮
云二水
僊所居丘壑心常適軒車會不同無須論入夜片月
已浮空

深居學避喧何似辟疆園松菊門三徑蒲萄酒一尊
晚涼吟蟋蟀歲久長鷄豚不淺玄虛抱宜從二仲論
玉湖當此日心賞復如何東下滄溟近西成禾黍多
蛟龍堪卧壑烏鵲待填河向夕紛漁唱偏從籬落過
高眠乘暑退長嘯遏雲流砧送千門晚桐飄一葉颺
世人高白紵吾道足滄洲宋玉緣何事淒涼作賦愁

吾意豈沾沾空然此地淹間來常鼓腹興至一掀髯
涼雨當窓灑奇雲入望纖也知狂與嬾嵇阮未能無
屢過狂客里獨倚步兵厨蘼色還三島心期自五湖
衣霑零露細吟對落星孤夕月休相笑霜華已滿顱

七夕有感二首

天路橫烏鵲星期會女牛如何清漏下不見美人遊
萬事乾坤隔孤心日夜愁追魂曾有術那得近針樓
邑邑不自得冥冥何所之鼙聲當戶發雲影度河遲
暮雨陽臺夢幽蘭楚客思相將終此夕寂莫不勝悲

送諸春元赴試六首

陸錦沙謝文泉

江左謝康樂雲間陸士龍千金矜驤裏雙劍結芙蓉
去待金門詔來聽長樂鐘一時聲績起誰不慶遭逢

沈東霍

逸俊沈休文西行興不群涼飈隨地滿春色隔年分
價重燕臺駿神披魏闕雲

君王慕詞賦早使姓名聞

沈大若

應詔屬金天逍遙望若僊揚旌臨上谷奏賦入甘
來鍾送千門曙香披五色煙從來

明聖代祥鳳共翩翩

兄官太史

王掬川

瑞氣藹蓬萊行遊亦壯哉共高

聖主頌獨上郭生臺圖駿誰堪並雕龍自有才春風
江上路知爾捷書來

賦得長安道送林竟宇

璇極開黃道祥風散紫埃花香來漢苑柳色接燕臺
日月中天麗車書萬國來上林元繫籍緩轡看花回
賦得紫騮馬送李少峯包繼泉

寶馬飾金羈驕鳴上玉墀言承千里選擬結九重知

花暗長楊苑波澄太液池酬恩還顧影蹀躞又當時

李父包祖
嘗爲御史

張永遜過飲候月

愛爾巖栖客猶能問草堂相看餘白髮有味只滄浪
明月來何晚清尊興獨長小山多桂樹何日更徜徉

簡汪仲安

結念在山溪猶然城寺栖白雲隨杖底涼雨掛簷西
淨境人天接明心佛日低何因捐俗累就爾問菩提

秋園漫興和竹墟二首

心賞何由適來尋湖上居林飈當書滿江雨入蘼疎

歲月長歌裏乾坤一笑餘却嫌商嶺客躑躅意何如
舊是羽人丘還同上客遊清暉流碧樹幽興寄滄洲
解帶冷風入開尊湛露浮不知人世上擾擾欲何求

汎舟和竹墟二首

共言湖色好向晚一移舟坐近鷗相得心閒波不流
踈星低遶樹長笛起中洲恐觸蛟龍卧無令數洗甌
浩蕩水晶宮披襟映若空千門踈柳外孤艇夕易中
碧是三神島清還少女風何因乘此興去去入無窮
七月晦集諸彦於十洲閣分得何字二首

豈是卧龍窩終朝對薜蘿有懷同沮溺無客不羊何

醉眼青天小高吟白雪多幽陽迷處所幾欲問嫦娥
此日真全落相看賞亦多風砧停午籟霜鏡展穠波
不遣玄言盡其如高會何晚來暝色起滿地竹枝歌
又和五首嘉則賓甫長文田仲鄭朗得吾字

岸幘坐玄壺翛然似畫圖門窺城樹縹峯落海天孤
莽蕩從人代沉冥且故吾三分穠色裏那借筆閒徂
得人字

僻地少風塵相將一問津寒蟬深坐樹露草暗留人
濁酒宵同盡穠光曉又新漫令飛動意寂莫大湖濱
得沉字

湖上一蘓林俄看仲月臨波濤互吞吐魚鳥共浮沉
稍釋區中縛彌澄物外心悠然放棹去何處落清砧

得間字

幽興頗能關君如大小山蟾蜍空自匿叢桂又同攀
人世忘機外時名冷笑間輕鷗還片片來傍釣磯閒
得情字

蘓風始覺清蘓月未能明對此一尊酒寧孤千日情
放歌神自王傲世氣難平却笑澄湖上空高狂客名
八月十三日飲戴仲德葉鄭朗得澄字

層樓盡日凭况復酒如澗隔市囂全減當蘓氣已澄

山餘青桂樹人對玉壺冰華月他宵滿居然興可乘
贈仲德訪李總戎

明到蛟川去孤帆破浪開海峯天際落塞鴈月中來
名豈將軍借豪仍俠士推登遊足詞賦可復似鄒枚
送吳山人未嘉游天台二首

天路懸滄海霞文擁赤城高人從此去幽抱向誰傾
花認劉郎跡山餘葛令名無能同作賦空復想金聲
散髮坐層霄僊人曾見招春深花競發溪漲雪初消
倚樹聽山鳥披雲度石橋不須招隱曲吾興亦飄飄
寄題梅叅戎紫霞山房

豹隱偏隨霧龍嘘但出雲何如千嶂裏常挹紫霞芬
古樹經春長清猿入夜聞不妨邊檄動重起李將軍
初春吳呂二山人戴太學山堂小集得迷字時
吳來自台呂至自晉戴至自梁楚

共有探春興來過徑不迷沙暄花漸發雪罷鳥初啼
洗爵臨池上看雲過竹西壯遊空宇內不必羨幽栖
和三首得披字

林卧將迎少何當促膝時煙花一杯酒風雨幾年思
臺迥山爭出泥香燕獨披向來金谷賞可似習家池
得扶字

春至興難孤披襟俯碧湖纖桃迎日笑弱柳倩風扶
塵世真浮客吾曹亦酒徒他時能數過不復受人呼
得冥字

湖畔一虛亭誰言似聚星冷風春習習香霧晝冥冥
不遣楊花白寧辭竹葉青總多猿鶴侶久不負山靈
簡屠田仲

却事便高卧何因病未蘇可誰常下榻與爾一呼盧
節序逢黃鳥風花上玉湖行遊懷舊侶此際不能無
題李南浦江樓

層樓真入漢僊氣自來鐘地割滄江竅窓懸太白峯

中天行日月深夜起蛟龍幾欲探源去猶疑雲壑重
李孝甫兄弟視陸婿病因遣訊酬答

何意東牀病頻勞問訊過人非冰玉儷情是棣華多
已藉刀圭力還乘氣候和所慙無以報吟望倚松蘿
余君房偕聞楊二子偶過湖上

佳客何方至相逢雲水間晴霞初冉冉幽鳥正關關
倚坐霏寒玉開簾見遠山行厨慙不給日暮竟空還
秋日李毛周陸包七太學携酒過湖亭

湖上幽棲地何當載酒過虛名非汝穎佳客盡羊何
纔入江城早山巖桂樹多相看已傾倒不惜醉顏酡

賦得滕王閣送汝震兼簡徐子與使君

當年歌舞地過客好傳觴勝自盤江渚名猶擅豫章
霞光來五老藻賦得三王下榻何爲者流風尚未央

送李孝甫遊留都

春草遍江南奇遊性所耽言乘剡溪棹行駐白門驂
日月人文麗河山王氣含朋交知不少倒屣聽霏談
送仲德遊白下得衣樓二字二首

春色正芳菲西行趨不稀澄江千里道斜日片帆飛
劍氣橫牛渚天光上燕磯不妨五陵俠裘馬自輕肥
奕奕舊皇州重看結轡遊宮鶯連上苑御柳夾朱樓

牛首千峯久龍江五色流登臨如有賦先擬寄林丘

同諸彦過湖上

時來俗況無携客上春湖映水樓臺靜盤雲島嶼孤
好花留駐蓋鳴鳥勸提壺試問黃冠老千穉能幾徒

送賈叅軍移官南都

風流還入幕去去冶城陰望氣知天邑分曹得羽林
鳥鳴官舍靜柳隱騎營深獨有當車卧空懸借寇心

贈鄒子宜兼簡鄭環浦林少峯馬鍾陽

名義得
閩人號

峯
公

喜是閩南客尋真偶見過青雲披逸氣白雪動高歌

天一閣集卷之九
世故杯中盡離心江上多還將懷舊意一爲問煙蘿
送吳山人少君遊天台二首

見說尋僊去名山快一登龍湫滄海窟鳥道白雲層
心類無家客裝成帶髮僧古來高士品不獨數於陵
放歌臨海嶠窈窕石梁龔地古霞常滿霜清潦乍收
可誰驟白鹿待爾駐丹丘鼎物如堪就能無寄舊遊
徐孺子亭

孺子今何在孤墳章水陽時名高去就國祚卜存亡
落日悲猿語西風蔓草長經過幾賦客立馬奠椒漿
寄皇甫子循

憶我停輶日當君解榻年風波一相失世事轉堪憐
望入吳門練名高洛下編將因消夜候飛夢沂江煙
送屠長卿令韻上

看君初得意莽蕩出塵埃有鳥空中下何花縣裏栽
飲冰存浚節迎刃妙清裁他日徵奇績還應似漢才

清明

又是踏青天風光絕可憐桃花然宿雨榆火發新煙
坐樹紛歌鳥懸丘盡楮錢猶堪喧笑處牆上露鞦韆

酬徐惠卿

云是逃名客來過不憚勞庭初垂薜荔盤已薦櫻桃

琴覺無絃得棋稱不着高須知人代裏亦自有吾曹

贈周隱君

山人成獨往早歲賦閒居漸得休糧術時繙種樹書
巾車惟谷口鷄犬似秦餘却笑城居者名空大隱如

夏日華肇和見過

懸湖開小構留客雨初過涼思紛梧竹幽香入芰荷
山吟招隱賦渡引采蓮歌河朔當年事風流未足多

湖上

一到澄湖上冷然生隱心白雲依靜渚紅葉映疎林
擊榜漁歌起循階鳥跡深夷游忽二暮朗月在高岑

懷沈嘉則

已近中秋節常懷良夜遊美人不我至明月爲誰留
露下蕪葭冷天空島嶼浮一尊殊可對空復上南樓
簡張纓泉

經時不言面東望苦懸神老去親交少秋來物色新
尊餘竹葉釀月滿桂花輪不惜高軒過相從岸角巾
寄高封部

不見高常侍淒涼三泖邊林居寡魚雁江路隔風煙
白髮經年長丹砂何日傳久事修煉宵來華月滿隨夢入
吳天

中秋飲纓泉宅泛湖待月

佳節秋方半清遊夜不孤張筵當別時放棹下澄湖
雲濕疎鍾逗沙寒宿鳥呼月華應可攬深坐醉屠蘇
聞屠貞夫計至桃花渡阻風

此日親交感倉皇欲問舟浪喧妨過客風怒詫陽侯
未即臨江北猶然坐渡頭不堪雙涕淚灑逐水東流

虜警

一夕羽書聞燕郊入虜群加浮清海月烽斷紫關雲
宵旰勤

明主安危仗募軍欲知漢飛將萬里策奇勲

朱大尹禱金沙井獲雨二首

窈窕古龍宮，遙當太白東。
金沙齊擁霧，玉澗亂無風。
承黍蒼茫外，人家笑語中。
知君虔禱意，蚤已格玄穹。
滿地愁妖魃，單車謁上靈。
忽驚雷破壑，不覺水流腥。
野接湖江白，春迴草樹青。
憑將父老頌，萬里達朝廷。

畚石渡夜發

復作看山去，宵來興未降。
纖霞浮斷岸，寒月闌空江。
潮下神何壯，鴻飛影自雙。
撫時無可晤，吟嘯倚船窓。
酬田仲

舞綵名公子含香書省郎一朝稱上疏千里遂還鄉
賦就高鸚鵡酣來典鸛鷖祗慙嵇叔嬾凝望水雲長
和包明臣賞牡丹

偶作看花會憐君發興長調真傾李白品肯讓姚黃
背日微含笑當風暗度香只疑神欲銜夢裏逐襄王
吳少君見過

節候入清和當君千里過芸房迎下榻鳥徑罷張羅
不覺玄言暢寧辭濁酒多出門看倒景早已掛簷阿
酬王百穀示東遊諸作

裘馬來過地王生膽氣豪無能輸結機空復羨揮毫

大雅看前輩中興藉爾曹
嗒然神慮豁詎俟更觀濤
初夏同袁池南載酒張纓
泉紫微莊值病初起

二首

風日引僊槎相將路不賒
開軒傍梧竹岸幘話桑麻
笑我難題鳳當君已悟蛇
不妨歸去晚城上罷鳴笳
自解西園會侵尋歲日過
峯猶懸戶牖松已裊煙蘿
不惜清尊盡其如爽氣多
從來忘世士結念在林阿

竹墟挽詞八首

里門分手地驅馬各東西
天地不相待煙霞莽自迷
春深花嬾發月落鳥空啼
神爽依然在中宵一下乚

治行高諸國威名龍章百蠻偶因忤上宰翻這偃東山
世態浮雲裏年華逝水間獨餘星宿氣炯炯照人寰
白首相親舊泉臺不復晨乾坤餘意氣龍馬失精神
塵海年年變交游日日新可憐山水調寂莫爲誰陳
鶴馭嗟何適冥冥不可求古今俱逆旅天地一虛舟
不作僊姑客還從楚子遊

公嘗稱會仙姑於澧州楚子李於太和山向來

飛動意端不戀衾裯

星父與楹日呂公應卜年望猶高渭水身豈憊皇天
萬事雲風隔孤心日月懸一杯吾欲酌恨不到重泉
屬續知何事諄勤獨念吾臨風貪想像望月倚踟躕

不復移書札空然攬畫圖承家藉令子遺恨自應無
已失張司馬何當更哭君龍蛇當日兆天壤此生分
林靜餘啼鳥江空出斷雲祗應丹旆發白馬共氤氲
見說郭門北茂陵新起阡封高矜馬鬣地勝得牛眠
海鳥紛相吊江流去不旋

主恩思舊伐還許象祈連

東沙說詞八首

鍾動俄聞訃披衣淚滿巾詎堪聽履客遽作奠楹人
靈氣回山嶽端儀罷縉紳淒涼人代裏白日黯風塵
一納清朝祿頻年奉宴遊花前安石墅月下庾公樓

愛客投車轄呼童唱酒籌心期今已矣嗚咽水東流
林下今司馬天中舊玉麟一朝捐劍鳥萬里上星辰
雲海慘無色花宮寂自春山陽今夜笛聽能獨傷神
海內失儒宗千秋不可逢天才高倚馬藻賦陋雕蟲
一自玄堂閉空餘絳帳重斗間龍劍氣寂寞冷芙蓉
同志復同鄉逢人說范張讎書徵竹素品豈屬驪黃
壯觀空流水幽心但夕陽辛酸思舊咏能不似周郎
霜日肅陰陰高城盡罷砧憑棺賓從淚舉火族隣心
誰解釣天寤空聞薤露吟牛山自有恨况復雍門琴
兀坐謝琴尊園春書掩門思君不可見落日又黃昏

草結王孫恨雲迷蜀帝魂向來心曲事愁絕詎堪論
訪落逢

明主君當遺耆先寸心曾夾日片語欲回天黃髮今
安在蒼生自可憐易名丹鳳詔何日下甘泉

會竹墟墓二首

古渡入桃花玄宮勝足誇臺懸青是海門擁白爲沙
芻束來何地竹書藏滿車欲知丁令鶴他夜定還家
夜壑藏舟日親交去住間情深牽素脰夢香落蒼山
待月吟猿起經春宿草班何人來掛劍拱木儘堪攀

夏日李孝甫兄弟置酒湖上

有興高河朔，携尊就草堂。
當門沙鳥並，捲幔水雲涼。
幽擬竹林賞，輝看棣萼芳。
天西流片月，歸棹詠滄浪。

周畫師同子與弟子游海上三首

海門一相見，掃素爲遲留。
顧我非麟像，知君是虎頭。

青雲餘地望

祖起家翰
林學士

白眼睨時流，五岳從茲適。

何當嗣舊遊。

之子興翩翩，從師且問船。
江風聽潮夜，梅雨濕衣天。
沒骨應前代，點晴還幾年。
交知如我問，卷裏貌堪憐。
下馬岸烏巾，來從笠澤濱。
芳年初作客，窮海一寧親。
業紹丹青舊，圖開丘壑新。
掖庭如有召，肯復負才人。

詒吳少君時寓寶雲寺

獨憐吳季子抗志在煙霞窮海遊爲客空門到是家
日高翻貝葉風定落天花欲識無生理猶慙塵慮賒

挽張別駕舉

隨州人

我思張別駕零落忽多年家世槎溪隱才名桂嶺傳
墓前慙表碣曾爲墓表卷裏悵詩篇見說諸賢胤翩翩人
士前

夏日期張纓泉袁池南張石里結社湖上

城中名大隱而我索居人賴是論心舊來從結社新
湖波掙綠雪天籟發青蘋對此情怡適何辭漉酒巾

七夕志感二首

天上雙星會，寰中七夕期。
流雲承鵲駕，纖月映蛾眉。
顧影還如舊，含情欲待誰。
飛螢趁颺吹，冉冉入絺帷。
豈不念疇昔，虛庭坐獨深。
明河天際沒，寒杵月中沉。
有望空青鳥，何言託素琴。
別來雙綰帶，零落負同心。

戲簡嘉則

歲暮始還鄉，遊心似未央。
饑鳥蹲古樹，積雪暗橫塘。
白社重呼侶，黃金一解裝。
深閨凝望久，何物侑飛觴。

送王少微

買棹向西津，高懷輕苦辛。
句吳千里道，滄海獨歸人。

潮落空江暮梅開古渡春相逢遽相別何以暢心神

聞陳海洲訃

把酒期何在藏舟壑已深龍蛇千古夢天地此生心
莫問雄雌劍空餘山水音瑤篇傳誦久端不媿陳琳
夜往慈溪臨馮貞所陳海洲即事

獨往凌西渡中宵抱火行空江迴古道寒雨閉孤城
下馬尋僧舍聞鐘理客程親知何處是零落淚沾纓
酬黃資安諸君

謝客偃雲蘿俄逢載酒過君懷稱慷慨吾病欲如何
海月窺城近天風入晚和冷然出門去朗月映湖波

除夕

歲盡寰中夕星迴極北躔人家喧爆竹鯨海淨烽煙
應節辛盤集迎春栢酒傳高呼隨外服聽漏欲朝天

元日望闕遥賀

堯年垂萬曆夏正肇三陽天轉蒼龍駕霞標紫極光
殊方齊拱闕

明主儼垂裳願以千秋鑑齋心獻未央

立春日簡黃整菴

鳳闕初頒朔牛鞭又報春詎知滄海內俱是白頭人
草送登山屐花迎漉酒巾高懷知不淺肯惜往來頻

簡袁池南

觀風七閩使卧雪四明家得歲人徵瑞乘春物翫華
杯應浮竹葉頌喜得椒花出郭期何日風條萬柳斜
人日

霽旭上江津條風應候新已看春作伴更喜日爲人
林鳥催歌扇風花待舞裯從知輕世士不必上麒麟
湖上春興

一斛區中縛頻爲物外娛尋春寧出郭選地故臨湖
但覺鳬鷗近何言島嶼孤他年論出處或恐似潛夫
秦中舍將遊海上因寄

聞有尋真興何時下海東徵心離象罔灝氣挹鴻濛
佩染三山霧旌遙五兩風丹成宜有訣待爾出樊籠
由它山迤邐中潭冷水涸三十里至彰聖道中
名山延攬地人物似秦餘一徑通天姥千峯掛斗虛
林香芝作飯蕉古葉供書劉阮如堪遇他年共結廬
寺中

名利空山裏霜天偶一攀燒煙迷谷口花水到人間
觸眼慈雲不冥心佛日間猶然忘
廢灌頂寺
俱色起前山

古寺碧雲空遺蹤不可尋煙霜橫絕澗豺虎閉空林

自有傳燈術難消出世心從知塵是幻駐馬發長吟

中潭

弭棹句章上江迴古廟含不知重嶺外更自有中潭
歲穰鷄豚富霜清橘柚酣遺塵何處所謝隱士延佇萬
峯南

贈周丞

豈不窮山海幽居羨有君徑餘三仗雪峯墮五溪雲
輕世年華換香名月旦聞何因借一榻長日對爐薰

夏日集十洲閣

坐裏芳湖社差池易隔年涼颼催送酒落日故停船

樹影搖虛閣漁歌雜采蓮時平捐物累早已得真筌

人日

此日逢人日新年異往年陽烏低拂曙川柳澹生煙
客暢屠蘇飲門餘綵勝傳農祥行可啓伐鼓藝春田
訊賓父養疴蕭寺

裘馬競踴踴城春遊未央山人何意緒佛子故相將
貝葉翻名帙梅檀染異香從來色空裏不復困津梁
上元

碧宇淨無垠酣歌起四隣人稱上元夕天作太平春
燈月臨城近煙花接跡新何當携興去懷袖裛芳塵

天童寺

渡杯開淨域法供藉僊群
塵駕猶然往靈風不可聞
雅食雙樹雪簷落九峯雲
延佇紆心賞前林起夕曛
明山絕頂

天迥峯孤掣洞明窓四懸
崑崙懸地軸牛女挾星躔
側足盤雲上長歌候月旋
欲乘婚嫁畢結宇是何年
和安硯亭四豪咏

下士群公子翩翩意氣長
朝來屠狗肆莫向闔鷄場
珠履三千會金釵十二行
酬知無拯難俠骨死猶香
戲簡中甫

天曉霧蒼蒼啼鶯徹華堂佳人愁倚瑟遊子報還鄉
未解黃金橐先呼白面郎向來離別恨此際可相忘

夏日遣興

積雨漲空陂開關日較遲齒隨年並進身與靜相宜
編簡聞新得交游屬故知誰言北窓卧始似上皇時